



Brčko, 20.12.2024.godine

Održan Prvi prekogranični startup biznis forum NESESER projekta

Prvi prekogranični startup biznis forum NESESER projekta održan je 16. i 17. decembra 2024. u Omladinskom centru Brčko distrikta, okupivši vrhunske stručnjake, preduzetnike, predstavnike izvršne i zakonodavne vlasti, civilnog sektora, te privrednike i brojne građane.

Forum je otvorio gradonačelnik Brčko distrikta BiH, gospodin Siniša Milić, koji je istakao da je ovaj forum važan korak ka jačanju preduzetničkog duha s posebnim naglaskom na osnaživanje mladih i žena u vođenju startup projekata.

“Ovaj dvogodišnji projekat otvorio je vrata inovacijama i novim poslovnim mogućnostima i ojačao saradnju između Brčko distrikta BiH i Loznice. Mi u Brčkom već imamo određena iskustva u oblasti projekata samozapošljavanja i to već dugi niz godina implementiramo u oblasti privrede i poljoprivrede. Vjerujem da će nam ova iskustva i sa ovog Biznis foruma pomoći da i naš program koji se finansira iz budžeta značajno unaprijedi”, rekao je Milić.

Indira Lević Muharemović, menadžerka na projektu NESESER rekla je da je, između ostalog, cilj organizovanog foruma i da se saberu utisci dvogodišnjeg rada.

„U okviru ovog projekta bilo je deset startup preduzeća u Brčkom i deset u Loznici. Ovo je finalna i posljednja aktivnost ovog projekta, ali ujedno i najava nastavka projekta tako da ćemo se družiti i pomagati naše preduzetnike, startup i u naredne dvije godine“, rekla je Lević Muharemović.

Nenad Jevtović, direktor Instituta za razvoj inovacija - IRI, naglasio je da su se kroz ovaj projekat uspjela uspostaviti dva poslovno preduzetnička inkubatora.

„Ovaj forum dolazi kao posljedica i kao kraj ovog projekta gdje će se dodatno razmijeniti znanja i napraviti novi dugogodišnji planovi za saradnju između Brčkog i Loznice, ali i za širu saradnju. Mladi u Loznici su po prvi put dobili priliku da imaju jednu instituciju, mjesto i podršku gdje se okupljaju i gdje mogu da razmjenjuju iskustva i znanja sa svojim partnerima“, rekao je Jevtović.





NESESER projekat (Usluge za novoosnovana startap preduzeća) sufinansira Evropska unija u okviru finansijskog instrumenta pretpristupne pomoći kroz Program prekogranične saradnje Srbija – BiH (2014 – 2020), te implementira Razvojno - garantni fond Brčko distrikta BiH (RGFBD), u partnerstvu s Gradom Loznica i Institutom za razvoj i inovacije – IRI iz Beograda. Ugovor za sufinansiranje sredstvima Evropske unije potpisan je sa Ministarstvom finansija Republike Srbije – Sektorom za ugovaranje i finansiranje programa iz sredstava Evropske unije. Cilj projekta je unapređenje preduzetničkog okruženja za startapove koje vode mladi i žene, s naglaskom na samozapošljavanje i prekograničnu saradnju. Projekat doprinosi ekonomskom rastu i zapošljavanju u Brčko distriktu BiH i Loznici kroz jačanje preduzetničkih sposobnosti ranjivih grupa.



16.12.2024. Gradonačelnik Brčko distrikta Siniša Milić na otvaranju Prvog prekograničnog startap biznis forum NESESER projekta





16.12.2024. Indira Lević Muharemović, menadžerka na projektu NESESER



16.12.2024. Prvi prekogranični startup biznis forum NESESER projekta, Brčko distrikt BiH



Projekat sufinansira Evropska unija